

# Calon muda kelebihan BN

SH 9/9/2024 M/S 18

FOTO: BERNAMA

Pemilihan Syed Hussien mampu tarik undi golongan muda

Oleh LIZA MOKHTAR  
SHAH ALAM

**K**eputusan menamakan calon muda untuk bertanding pada Pilihan Raya Kecil (PRK) Dewan Undangan Negeri (DUN) Mahkota dilihat memberi kelebihan kepada UMNO-Barisan Nasional (BN).

Pensyarah Pengajian Polisi, Fakulti Perniagaan, Ekonomi dan Pembangunan Sosial merangkap Felo Penyelidik Unit Literasi dan Advokasi Politik, Universiti Malaysia Terengganu, Profesor Madya Dr Mohd Yusri Ibrahim berkata, pencalonan Ketua Pemuda UMNO Bahagian Kluang, Syed Hussien Syed Abdullah mampu menarik undi golongan muda.

"Selari dengan pelaksanaan Undi18 dan pendaftaran pemilih secara automatik yang telah menyaksikan peningkatan ketara bilangan pengundi muda, pencalonan Syed Hussien, 40, dilihat boleh meraih sokongan segmen pengundi itu.

"Walaupun masih terlalu awal untuk menilai keterampilan beliau secara keseluruhan namun pemilihan calon muda ini sendiri sedikit sebanyak memberi kelebihan awal kepada BN," katanya kepada *Sinar Premium*.

Ditanya jika penamaan Syed Hussien boleh dianggap mengguris



Pemilihan Syed Hussien (enam dari kanan) dilihat satu kelebihan kepada UMNO-BN.

perasaan sayap Wanita UMNO yang sebelum ini menuntut diberi peluang meletakkan calon mereka pada PRK DUN Mahkota 28 September ini Mohd Yusri berkata, keputusan itu sepatutnya tidak memberi kesan kepada sayap parti itu apatah lagi untuk berkecil hati.

"Pertama, sudah tentu keputusan ini dibuat secara konsensus oleh pimpinan parti peringkat tertinggi yang barangkali turut disertai pemimpin wanita.

"Kedua, dalam situasi sekarang UMNO perlu menampilkan calon yang dianggap terbaik untuk menang. Tiada lagi jalan mudah untuk UMNO pasca Pilihan Raya Umum ke-14 pada tahun 2018.

"Justeru, atas faktor inilah UMNO memilih calon daripada sayap Pemuda untuk dinamakan sebagai calon, mengambil tanggungjawab daripada Wanita.

Saya percaya Wanita UMNO memahami senario dan keperluan ini dan mereka berlapang dada demi kepentingan parti," katanya.

**PRK DUN MAHKOTA**

Turut senada, Pensyarah Kanan Fakulti Sains Pentadbiran dan Pengajian Polisi Universiti Teknologi MARA (UiTM) Seremban, Dr

Muhamad Fuad Abdul Karim.

Katanya, pemilihan Syed Hussien merupakan satu bonus untuk UMNO-BN.

"Peratusan pengundi muda di DUN Mahkota sekitar 52 peratus dan sewajarnya pemilihan beliau satu kelebihan walaupun pada dasarnya corak pengundian di Malaysia lebih menurus kepada faktor parti.

"Ini membuktikan UMNO-BN memperakui peranan dan kredibiliti calon muda," katanya.

Jelasnya, berdasarkan rekod undi pilihan raya UMNO-BN di DUN Mahkota kemungkinan Syed Hussien juga boleh menjadi calon kegemaran.

"Ditambah dengan kebolehan beliau berbahasa Mandarin, ia menjadi kelebihan besar untuk menarik hati pengundi Cina. Ia dilihat sebagai strategi bijak UMNO-BN untuk menang di DUN Mahkota," katanya.

Tambahnya, tidak timbul soal pencalonan Syed Hussien umpama meminggirkan sayap Wanita UMNO berikutan Ketua Wanita UMNO, Datuk Seri Dr Noraini Ahmad telah menyatakan komitmen untuk menyokong siapa pun calon yang dipilih mewakili BN.



MOHD YUSRI



MUHAMAD FUAD